

S(weig) M(eide) L(eide).

Secretarium

Anno etc. lxx<sup>o</sup>.

Item, tempore Wentzeslai regis seyn der rath vnnd dy uffm Hantwercke sere entzwei gewest. In der Zeit hatten die vom Hantwercke geschicket etzliche zcum Herrn Konige: Vnnd do dy gein der Zittaw qwomen, do liss sihe der rath wider holen vnnd uffm Rademargkte dy koppe abeslohen. (1405.)

In der selbigen Zceit hatte der Rath lossen verronen dy gasse, dy do von dem Handwercke by den mönchenn geeth: Item dy by dem margkte do nw der junge Vrban wonet. Vnnd dy woren wol drei gancze wochen verronet gewest.

Item der selbigen Zceit hatten dy vom Handwercke eyn priuilegium vom königk Wenczlaw awssgebracht, das ein jderman in der Stadt vnnd vor der stadt Bir brewen mochte vor seyn Hawss, em zcu notdorfft vnnd seynem gesinde, wer das wolde thun, vnnd der dorffte den Bürgermeister dorumb nicht grüssenn, noch den rath. Vnnd das priuilegium habe sihe geweisset eynem gutten manne.

Darnach tempore Albertj regis, vnnd wolden dass lossenn confirmiren do wart en geantwort das sihe das swerlich jrwerben mochtenn. Wen der konigk fragen wurden noch der neesten confirmation. Vnnd so sihe denne dy nicht hetten, so mochte en das versaget werden, do mit sihe wider zu verwillen mit dem rathe kommen möchten. Vnnd so haben sihe ess lossen anstehen biss her.

Vnnd dorumb ist in gutten gedancken zcu habenn, sohe sy kommen vnd bitten em wilde en ghonnen eyn Bir zcu brewen, das man sihe nicht lange vmb treibe: sunder en das zcu sage: vnnd das sihe des priuilegij confirmation bitten wolden tempore Albertj regis.

Doruff furte sihe Heincze Kotwicz dy Zceit Hauptman hy zcu Gorlitz. Diss priuilegium<sup>1)</sup> haben sihe noch by en, Sunder by jren geswornen eyden noch melden noch jmandis sagenn.

2. Von dem verdinten lohne wisse das es en ny zcugeben ist, als sihe sagenn: Sunder so sihe vor gehegete bangk kommen seynn vmb der sache wille, so hath man sihe an die meister geweisset. Vnnd do von haben sihe nw das jnn eyne gewonheit gebracht.

<sup>1)</sup> Leit auff heute bei dem Rathe getottet.

Heincze Cotwicz, von der Stadt Gorlitz zum Hauptman anerkiestet vnter Thyemen von Colditz verwesern in ober Lausicz. Albrecht pater Vogt vnd Hauptman zu Schweidnitz. (1432.)